

## НЕДЕЛЯ ЧЕТВЕРТАЯ СВЯТЫХ ПОСТОВ.

ИНИИ ТИПИЦЫ ОПРЕДЕЛИША ПЕТИСЯ ПОСЛЕДОВАНИЮ  
СВЯТАГО ИОАННА ЛЕСТВИЧНИКА.

НА МАЛЕЙ ВЕЧЕРНИ СЛУЖБА ВСЯ ПО ОКТОИХУ ТОЧИЮ.

### НА ВЕЛИЦЕЙ ВЕЧЕРНИ,

Поставим стихов 10, и поем стихиры Осмогласника:

Воскресны 3, и Анатолиевы 4. Таже Триоди подобны 3, глас 8.

Подобен: **О**, преславного чудесе!:

**Стих:** Яко у Господа милость и многое у Него избавление \* и Той избавит  
Израиля от всех беззаконий его.

**Отче** Иоанне преподобне, \* выну воистинну \* Божия в гортани возношения  
носил еси \* поучаяся детьнейшим, \* богодухновенным словесем всеумудре, \* и  
оттуду истекаемою благодатию обогатился еси, \* быв блажен, нечестивых всех  
советования низвращая.

**Стих:** Хвалите Господа вси языцы \* похвалите Его вси людие.

**Отче** Иоанне преславне, \* слез источники душу очистив, \* и всенощными  
стоянии \* Бога умилостивив, \* восперился еси к люблению Сего блаженне и  
красоте; \* еяже достойно ныне наслаждаешься, \* непрестанно радуясь, \*  
со страдальцы твоими, \* богомудре преподобне.

**Стих:** Яко утвердися милость Его на нас \* и истина Господня пребывает во  
век.

**Отче** Иоанне преподобне, \* восперив ум к Богу верою, \* мирскаго смешения  
\* омерзил еси непостоянное; \* и крест твой восприим, \* Всевидцу последовал еси;  
\* тело необузданное \* подвигами обучения, помыслу поработив, \* крепостию  
Божественнаго Духа.

Слава, глас 5:

**Преподобне отче**, \* гласа Евангелия Господня послушав, \* мир оставил еси, \*  
богатство и славу нивчтоже вменив. \* Отонудуже всем возопил еси: \* возлюбите  
Бога, и обрящете благодать вечную. \* Ничтоже предпочтите паче любви Его, \* да  
егда приидет во славе Своей, \* обрящете упокоение со всеми святыми, \* ихже  
молитвами, Христе, \* сохрани и спаси души наша.

И ныне, догматик гласа. **Вход.** Свете тихий:

На литии же, яко обычно, стихира храма.

На стиховне стихиры Осмогласника.

Слава, преподобнаго, глас 2:

**На** земли ангела \* и на небесех человека Божия, \* міра благоукрашение,  
наслаждение благих, \* добродетелей постнических похвалу, Иоанна почтим: \*  
насажден бо в дому Божии, процвете праведно, \* и яко кедр в пустыни \* умножи  
стада Христова словесных овец, \* в преподобии и правде.

**И ныне, Богородичен:**

**О,** чудесе новаго всех древних чудес! \* кто бо позна Матерь без мужа рождшую, \* и на руку носящую, всю тварь содержащаго? \* Божие есть изволение, рождашееся. \* Егоже яко младенца, Пречистая, \* Твоима рукама носившая, \* и Матерне дерзновение к нему имущая, \* не престай молящи о чтущих Тя, \* ущедрити и спасти души наша.

**Н**ыне отпуцаеши: **По Трисвятом тропарь Богородице Дево: дважды.**

**И тропарь преподобному, единожды. Глас 1:**

**П**устынный житель и в телеси ангел, \* и чудотворец явился еси, богоносе отче наш Иоанне; \* постом, бдением, молитвою небесная дарования приим, \* исцеляеши недужныя, и души верою притекающих ти. \* Слава Давшему ти крепость, \* слава Венчавшему тя, \* слава Действующему тобою всем исцеления.

**И прочее последование бдения, яко обычно.**

## НЕДЕЛЯ ЧЕТВЕРТАЯ СВЯТЫХ ПОСТОВ.

### НА УТРЕНИ

По шестопсалмию, Бог Господь: во глас Осмогласника,

И глаголем тропарь воскресен дважды.

Слава, преподобному, глас 1:

Пустынный житель и в телеси ангел, \* и чудотворец явился еси, богоносе отче наш Иоанне; \* постом, бдением, молитвою небесная дарования приим, \* исцеляеши недужныя, и души верою притекающих ти. \* Слава Давшему ти крепость, \* слава Венчавшему тя, \* слава Действующему тобою всем исцеления.

И ныне, Богородичен, глас 1:

Гавриилу, вещавшу Тебе Дево, радуйся, \* со гласом воплощашеся всех Владыка, \* в Тебе, Святем Кивоте, \* якоже рече праведный Давид; \* явилася еси ширшая небес, \* поносивши Зиждителя Твоего. \* Слава всельшемуся в Тя, \* слава прошедшему из Тебе, \* слава свободившему нас Рождеством Твоим.

И обычное стихословие: и прочее последование.

По 1-м и 2-м стихословии седальны воскресны, гласа:

И полиелей. Степенны гласа. Прокимен, и Евангелие утреннее рядовое. псалом 50.

Слава, глас 8: Покаяния отверзи ми двери Жизнодавче, \* утренюет бо дух мой ко храму святому Твоему, \* храм носяй телесный весь осквернен: \* но яко щедр, очисти \* благоутробною Твоею милостию.

И ныне, Богородичен: На спасения стези настави мя Богородице, \* студными бо окалях душу грехми, \* и в лености все житие мое иждих: \* но Твоими молитвами \* избави мя от всякия нечистоты.

Таже, глас 6: Помилуй мя Боже, \* по велицей милости Твоей, \* и по множеству щедрот Твоих, \* очисти беззаконие мое.

Множества содеянных мною лютых, \* помышляя окаянный, \* трепещу страшнаго дне суднаго: \* но надеяся на милость благоутробия Твоего, \* яко Давид вопию Ти: \* помилуй мя Боже по велицей Твоей милости.

Каноны Октоиха: Воскресный со ирмосом на 4, и Богородицы на 2.

Ирмос: Спасителю Богу, \* в мори люди немокрыми ногами наставльшему \* и фараона со всевоинством потопльшему, \* Тому Единому поим, \* яко прославися.

Уподобихся Христе в руже разбойников впадшему, и биеньми еле живу от сих оставленному Спасе: и аз сице уязвлен есмь грехи моими.

Не презри мене недугующа люто, вопияше Спасе рыдая, на разбойники богатство изнуриый Твое. И аз сице молюся: ущедрй и спаси мя.

Уврачевавый мя убиен имуща ум грехи в язвах, от разбойников неправедных и лукавых помышлений, Христе Спасе, спаси мя яко многомилостивый.

Богородичен: Пречистая Мати Христова, воплощашагося из Тебе, и от недр Родителя не отлучшася Бога, непрестанно моли, от всякаго обстояния спасти, яже созда.

Иный канон преподобного, глас 8.

**Ирмос:** Воду прошел яко сушу \* и Египетскаго зла избежав, \* израильтянин вопиаше: \* Избавителю и Богу нашему поим.

**Во** свет невещественный и умный, от печали вещественных востек Иоанне преподобне, молитвами твоими ко Господу просвети мя.

**Яко** воздержания сладость ссав, отринул еси горесть сластей: темже паче меда и сота улаждаеши отче, чувства наша.

**Возпел** на высоту добродетелей, доле плещущия поплевав сласти, сладость явился еси спасения, преподобне отче, стаду твоему.

**Богородичен:** Премудрость и Слово Отчее несказанно рождающая, души моя лютую уврачуи язву, и сердца болезнь укроти.

**Катавасия:** Отверзу уста моя ...,

Песнь 3.

**Ирмос:** Силою Креста Твоего, Христе, \* утверди мое помышление, \* во еже пети и славити \* тридневное Твое Воскресение.

**Путем** жития Христе, люте путешествуя, уязвлен есмь от разбойник в страстех: но возстави мя молюся.

**Разбиша** ум мой разбойницы, и оставиша мя в язвах еле жива прегрешений моих: но исцели мя Господи.

**Обнажиша** мя Спасе Христе, заповедей Твоих страсти, и сластьми уязвихся: но излей на мя милость.

**Богородичен:** Моли непрестанно Чистая, Прощедшаго из чресл Твоих, избавитися лести диаволи, поющим Тя Матерь Божию.

Иный.

**Ирмос:** Ты еси утверждение притекающих к Тебе, Господи: \* Ты еси свет омраченных, \* и поет Тя дух мой.

**Попалил** еси углем обучения преславно страстей терние, и согреваеши монашествующих состояния.

**Миро** освящения от постнических преподобне аромат, весь сложился еси в воню благоухания Божия.

**В** законех обучения поучаяся, страсти потопил еси, якоже иныя ныне фараониты, течением слез твоих.

**Богородичен:** Устави мое непостоянное помышлений, Чистая, смущение, Мати Божия, к Сыну Твоему направляющи движение.

Седален, глас 5.

**Подобен:** Странное:

**Пречистый** Крест Твой, Спасе наш, яко оружие спасения содержаще, тем Тебе вошем: спаси ны пострадавый волею о нас, всех Боже, яко многомилостивый.

Слава, преподобного, глас 4.

**Подобен:** Вознесыйся:

**Добродетельми** к небеси возсиявый, водружен яве, возшел еси к Боговидения

неизмеримой глубине благочестно: вся убо победив демонския козни, покрываеши же человеки от вреда сих, Иоанне, лестнице добродетелей: и ныне молишися спастися рабом твоим.

**И ныне, Богородичен. Подобен:**

**На** престоле херувимском седай, и в недрах Отчих водворяйся, яко на престоле седит святем Своем Владычице, в недрах Твоих плотски: Бог бо воцаривыйся тако над всеми языки, и разумно ныне поем Ему: Егоже и Ты Чистая моли, спастися рабом Твоим.

**Песнь 4.**

**Ирмос: Услышах слух силы Креста, \* яко рай \* отверзся им, и возопих: \* слава силе Твоей, Господи.**

**Разбойницы** окрадоша мое деяние Божественное, и оставиша мя язвами мучима.

**Извлекоша** мя Спасе заповедей Твоих, непостоянная помышления моя, отонудуже уязвлен есмь прегрешеньми.

**Левит** ранами уязвленна, яко виде мя, мимо иде, Спасе мой: но Ты мя спаси.

**Богородичен:** Господственно прославляем Тя Богородице Безневестная, и к Твоему пристанищу вернии прибегаем.

**Иный.**

**Ирмос: Услышах, Господи, \* смотрения Твоего таинство, \* разумех дела Твоя \* и прославих Твое Божество.**

**Яко** цветник благовоннейший, и добродетелей рай одушевленный, воздержание процвел еси, имже вся напитал еси чтущия тя.

**Законоположителя** обучения, и монахов правило кротчайшее, яко Моисея ты и Давида воистинну, стяжавше отче, ублажаем.

**Насажден** на водах воздержания, явился еси блаженне, розга отче благоцветущая, благочестия грозды произносящая.

**Богородичен:** Под летом бываема, от Отца безлетно возсиявша, Богомати нам родила еси: Егоже моли спасти поющая Тя.

**Песнь 5.**

**Ирмос: Утреннююще вопием Ти, Господи, \* спаси ны, \* Ты бо еси Бог наш, \* разве бо Тебе иного не знаем.**

**Иисусе,** посети раны души моя, якоже древле в руке впадшаго разбойнички, и уврачуй болезнь мою Христе, молюся.

**Болезненно** язвами изнемогах, Христе мой, прегрешений, и оттуду наг лежу добродетелей Божественных: молю, спаси мя.

**Иерей** якоже виде мя, и левит не возможе яве, мимоидоша бо мя: но Сам яко благоутробен, ныне спасение подал, и спасл еси.

**Богородичен:** Не презри Владыко окаяннаго мене, молюся, уязвленнаго умом болезненно от разбойник: но ущедрь молитвами Спасе, Рождшия тя.

**Иный.**

**Ирмос:** Вскую мя отринул еси \* от лица Твоего Свете незаходимый, \* и покрыла мя есть чуждая тьма окаяннаго; \* но обрати мя, и к свету заповедей Твоих \* пути моя направи, молюся.

Погасив вся страсти, росую подвигов твоих отче блаженне, обильно возжег огнем любви и веры, воздержания светильник, и просвещение безстрастия, и дне сын был еси.

Веры грозд, Божественным земледелием твоим отче воспитал еси, и в точила вложил еси, и возделал еси труды обучения, и чашу исполнь духовную воздержания: веселиши сердца стада твоего.

Претерпев добре прилоги и язвы противных врагов, явился еси столп терпения, утверждая стадо твое палицею Божественною, на пажити воздержания, и на воде воспитовая блаженне.

**Богородичен:** Речем Твоих устен Всечистая последующе, Тя ублажаем: с Тобою бо воистинну величия сотворивый Господь возвеличи Тя, и истинную Божию Матерь, рождейся из чрева Твоего показа.

#### Песнь 6.

**Ирмос:** Обыде мя бездна, гроб мне \* кит бысть: \* аз же воззопих к Тебе, Человеколюбцу, \* и спасе мя десница Твоя, Господи.

Страстьми иждих житие Божественное Владыко, и всяко прегрешеньми люте уязвен, прибегах к Тебе: ущедри мя, молюся.

Расхитиша богатство мое, и якоже мертва мя оставиша разбойницы, страстьми ум мой уязвивше: но ущедрив спаси мя Господи.

Яко виде левит мою ран болезнь, язв не терпя, мимоиде мя: Сам же Человеколюбче, изливал ми еси богатую Твою милость.

**Богородичен:** Купину Тя неопалимую, и гору, и лествицу одушевленную, и дверь небесную, достойно славим, Марие преславная, православных похвало.

#### Иный.

**Ирмос:** Очисти мя Спасе, \* многа бо беззакония моя, \* и из глубины зол возведи, молюся: \* к Тебе бо возопих, и услыши мя, \* Боже спасения моего.

Приял еси в души Божественное богатство Духа, непорочную молитву, чистоту, честность, бдение всегдашнее, воздержания труды, имиже дом познался еси Божий.

Вещества еже доле, премудре, претекл еси худость, невещественною же молитвою ум восперив, и вышняго упокоения явился еси наследник, совершенства ради жития.

Потами постническими углие стрел вражиих угасил еси воистинну, и огонь веры возсияв, попалил еси неверия, ересей шатания.

**Богородичен:** Возсия от Сиона вышняго благолепие, предложением плоти по соединению неизреченному, из Тебе Неискусобрачная обложенное, и мир просвети.

#### Кондак, глас 4.

**Подобен:** Явился еси днесь:

**На** высоте Господь воздержания \* истинна ты положи, \* якоже звезду нелестную, \* световодящую концы, \* наставниче Иоанне отче наш.

**Икос:** Дом Божий яко воистинну, самага себе соделал еси отче, Божественными твоими добродетельми: яве украсив яко злато светлое, веру, надежду, и любовь истинную: Божественныя законы излагая, воздержанием обучився яко безплотный: разум, мужество, целомудрие стяжав, смирение, имже вознеслся еси. Темже и просветился еси молитвами непрестанными, и небесная приял еси селения, наставниче Иоанне отче наш.

**Таже чтется синаксарий дневный.**

**Посем житие преподобнаго отца нашего Иоанна Лествичника, в мире скончавшагося.**

**Стих 1:** Иже плотию и живой, мертв сый Иоанн,

**Стих 2:** Вечно живет, и мертв явлься бездыханный:

**Стих 3:** Списание оставль лествицу восхождения,

**Стих 4:** Показует своего путь восхождения.

**Стих 51:** Иоанн умре в тридесятый день.

**И**же шестинадесяти лет сый, и остроумный сый, принесе себе Богу жертву священнейшую, на Синайскую гору возшед. Таже по девятинадесятих летех востав приходит в безмолвия поприще от пяти знамении Кириака: во обитель Палестры достиг, на место глаголемое Фола, четыредесять лет пожив, присно разжигаемь любовию, и огнем Божественныя любви. Ядяше убо вся, яже непорочно пристояху заповеди, но умеренно зело, и в сем гордости рог ломляя всепремудро. Но источник слез его кий ум изрек бы? Сна же причащашеся, елико ума существу бдением не вредитися. Течение же его молитва бяше присная, и к Богу любовь безмерная. Сими всеми богоугодно пожив исправленьми, и лествицу списавый, словеса учения изложив, и исполнен благодати достойно упокоися в Господе, многа и иная списания оставив. Егоже молитвами Боже помилуй, и спаси нас.

**Песнь 7.**

**Ирмос:** Превозносимый отцев Господь \* пламень угаси, \* отроки ороси, согласно поющыя: \* Боже, благословен еси.

**Разбойницы** обпадоша на мя окаяннаго, и язвами оставиша мертва, якоже бездыханна мя, темже молюся Ти: Боже, посети мя.

**Ум** мой плениша помышления непостоянная, и уязвивше страстьми, мертва мя оставиша, множеством прегрешений, но Спасе, исцели мя.

**Яко** виде левит мя ранами боляща, не терпя язв неисцельнаго ради, мимоиде мя, Спасе мой: но Сам уврачуй мя.

**Богородичен:** Ты от Девы воплотивыйся, спасл мя еси, язвам моим возливая богатую милость, Христе щедрот Твоих: сего ради Тя славлю.

**Иный.**

**Ирмос:** От Иудей дошедше отроцы, \* в Вавилоне иногда \* верою

**Троицескою пламень пещный попраша, поюще: \* отцев Боже, благословен еси.**

**На** злаце вышняго царствия, стадо отче воспитал еси и жезлом догмат звери отгнав ересей, воспел еси: отец наших Боже благословен еси.

**В** горний вшел еси и невестнический чертог Царства Христова, одеждою облечен достойною звавшаго, в немже и возлегал еси, вопия: отец наших Боже благословен еси.

**Не**влажная грехми, река явился еси воздержания отче, помыслы потопляя, и скверну очищая, вопиющих верою: отец наших Боже благословен еси.

**Богородичен: Из** чрева Твоего пройде воплотивыйся Дево, всех Господь: темже Тя Богородицу мудрствующе православно, Сыну Твоему зовем: отец наших Боже благословен еси.

### Песнь 8.

**Ирмос: Тебе** Вседетелю, в пещи отроцы, \* всемірный лик сплетше пояху: \* дела всякая Господа пойте, \* и превозносите во вся веки.

**От** разбойник помыслов моих Спасе, растлих житие мое согрешений язвами. Темже Божественнаго обнажихся образа, Тебе человеколюбиваго Бога: но ущедри мя.

**Пришел** еси на землю от вышних Спасе, ущедрив биеньми ураненнаго мя всего прегрешений язвами Щедре, и изливал еси на мя Христе, милость Твою.

**Тело** и душу Ты Владыко Спасе, избаву дал еси за мя, и спасл мя еси, мечем грехов узвленаго, в неисцельных язвах, яко милостивый.

**Богородичен: Тя** паче ума Богомужным словом рождшую Господа и девствующую, вся дела Дево благословим и превозносим во вся веки.

### Иный.

**Ирмос: Царя** Небеснаго, \* Егоже поют вои ангельстии, \* хвалите и превозносите во вся веки.

**Стоп** ты одушевленный яко воистинну, и образ воздержания отче стяжавше, вси твою память почитаем Иоанне.

**Множество** радуется монахов, и ликует преподобных собор и праведных: венец бо достойно с ними приял еси.

**Украшен** добродетельми, в невестник неизреченныя славы сошел еси, песнь воспевая Христу во веки.

**Богородичен: Помо**щи яже от Тебе требующия не презри Дево, поющия и превозносящия Тя во веки.

### Песнь 9.

**Ирмос: Исаие** ликуй, Дева \* име во чреве, \* и роди Сына Еммануила, \* Бога же и Человека, \* Восток Имя Ему: \* Егоже величающе, \* Деву ублажаем.

**Заповеди** Твоя Владыко, не сохранив разумом моим, в страсти вшел сластей, обнажихся благодати, и язвами извержен наг. Темже молю Тя Спасе, спаси мя.



**Н**иже левит возможе отмыти струпы моя: но пришел еси ко мне Блаже сострадательно, и излиал еси милость Твоих щедрот Спасе на мя, яко всеизрядный врач исцеляя мя.

**Я**ко сый благоутробен, ущедрив спасл еси Христе, язвами люте от разбойник Спасе убиена мя: душу же и тело Свое, яко динаря два дал еси избавление.

**Богородичен:** Паче ума рождество Твое Богомати, без мужа бо зачатие в Тебе, и девственно рождение бысть: ибо Бог есть рождейся, Егоже величающе, Тя Дево ублажаем.

**Иный.**

**Ирмос:** Чистую славно почтим:

**В**рач болящих в прегрешениях, от Бога блаженне, губитель же явился еси и прогонитель лукавых духов: темже тя ублажаем.

**З**емлю, якоже тли жилище, оставил еси отче, и в земли вселился еси кротких, и с ними веселишися, Божественныя наслаждаяся сладости.

**Д**аньсь день празднственный, вся бо созывает монашествующих стада, в лик духовный, на трапезу и снедь нетленныя жизни.

**Богородичен:** **В** Тебе вселився Всенепорочная, прежде родоначальники злонавно прельстившаго человекоубийцу Низложивый, родился, и вся ны спасе.

**Ексапостиларий воскресен, и преподобнаго.**

**Подобен:** Жены услышите:

**М**ира благострастия, якоже вреднаго уклонился еси, и безбрашием плоть увядив, обновил еси души крепость преподобне, и славою обогатился еси небесною преславне. Темже не престай моляся о нас Иоанне.

**Богородичен:** **Г**осподственно Богородицу Тя исповедуем Владычице, Тобою спасени: ибо Бога родила еси неизреченно, разоршаго Крестом смерть, к Себе же привлекшаго преподобных соборы: с нимиже Тя восхваляем Дево.

**На хвалитех поставим стихов 8, и поем стихиры Осмогласника.**

**Таже, глас 1:**

**Стих:** Воскреси, Господи Боже мой, да вознесется рука Твоя, \* не забуди убогих Твоих до конца.

**П**риидите делаим в тайном винограде, \* плоды покаяния в нем творяще, \* не в брашнях и питиих труждающесе, \* но в молитвах и постех добродетели исправляюще; \* сими угождаемый Господь дела, динарь подает, \* имже души избавляет долга греховнаго, \* един Многомилостивый.

**Слава, паки тойже. И ныне:** Препоблагословенна еси:

**Славословие великое, и тропарь воскресен.**

**Таже ектении, и отпуст. И стихира евангельская, и час первый.**

## НА ЛИТУРГИИ

Изобразительныя, и Блаженны Гласа, на 8.

Тропарь преподобному, Глас 1:

Пустынный житель и в телеси ангел, \* и чудотворец явился еси, богоносе отче наш Иоанне; \* постом, бдением, молитвою небесная дарования приим, \* исцеляеши недужныя, и души верою притекающих ти. \* Слава Давшему ти крепость, \* слава Венчавшему тя, \* слава Действующему тобою всем исцеления.

Кондак, глас 4.

Подобен: Явился еси днесь:

На высоте Господь воздержания \* истинна ты положи, \* якоже звезду нелестную, \* световодящую концы, \* наставниче Иоанне отче наш.

Прокимен апостола, рядового гласа.

Таже преподобнаго, глас 7: Восхвалятся преподобнии во славе \* и возрадуются на ложах своих.

Стих: Воспойте Господеви песнь нову. Воспойте Господеви вся земля

Апостол дне, ко Евреем, зачало 314. [Евр. 6, 13 – 20.]

Братие, Аврааму обетовая Бог, понеже ни едином имяше большим клятися, клятся Собою, глаголя: воистинну благословствуя благословлю тя, и мнозя умножу тя. И тако долготерпев, получи обетование. Человецы убо большим кленутся, и всякому их прекословию кончина во извещение, клятва есть. В немже лишше хотя Бог показати наследником обетования непреложное совета Своего, ходатайствова клятвою. Яко да двема вещма непреложныма, в неюже не возможно солгати Богу, крепкое утешение имамы прибегшии, ятися за предлежащее упование. Еже аки котву имамы души, твердо же и известну, и входящую во внутреннее завесы. Идеже предтеча о нас вниде Иисус, по чину Мелхиседекову, Первосвященник быв во веки.

И другой преподобнаго ко Ефесеем, зачало 229. [Еф. 5, 9 – 19.]

Братие, яко чада света ходите, плод бо Духовный есть во всякой благодости и правде и истине, искушающе, что есть благоугодно Богови. И не приобщайтесь к делом неплодным тмы, паче же и обличайте. Бываемая бо отай от них, срамно есть и глаголати. Вся же обличаемая, от света являются: все бо являемое свет есть. Сего ради глаголет: востани, спяй, и воскресни от мертвых, и осветит тя Христос. Блюдите убо, како опасно ходите, не якоже немудри, но якоже премудри, искупующе время, яко дние лукави суть. Сего ради не бывайте несмысленни, но разумевающе, что есть воля Божия. И не упивайтесь вином, в немже есть блуд, но паче исполняйтесь Духом, глаголюще себе во псалмех и пениих, и песнех духовных, воспевающе и поюще в сердцах ваших Господеви.

Аллилуиа, гласа, и преподобнаго.

Стих: Насаждени в дому Господни во дворех Бога нашего процветут.

Евангелие от Марка, зачало 40. [Мк. 9, 17 – 31.]

**Во** время оно, человек некий прииде ко Иисусови, кланяяся Ему, и глаголя: Учителю, приведох сына моего к Тебе, имуща духа нема, и идеже колиждо имет его, разбивает его, и пены тешит, и скрежещет зубы своими, и оцепеневает, и рех учеником Твоим, да изженут его, и не возмогоша. Он же отвечава ему глагола: о, роде неверен, доколе в вас буду? Доколе терплю вы? Приведите его ко Мне. И приведоша его к Нему. И видев Его, абие дух стрясе его, и пад на земли, валяшися, пены теця. И вопроси отца его: колико лет есть, отнележе сие бысть ему? Он же рече: издетска. И многожды во огонь вверже его и в воды, да погубит его, но аще что можеши, помози нам, милосердовав о нас. Иисус же рече ему: еже аще что можеши веровати, вся возможна верующему. И абие возопив отец отрочате, со слезами глаголаше: верую, Господи, помози моему неверию. Видев же Иисус, яко срищется народ, запрети духу нечистому, глаголя ему: душе немый и глухий, аз ти повелеваю, изыди из него и ктому не вниди в него. И возопив и много пружався, изыде, и бысть яко мертв, якоже мнозем глаголати, яко умре. Иисус же емь его за руку, воздвиже его, и воста. И вшедшу Ему в дом, ученицы Его вопрошаху Его одинаго, яко мы не возмогохом изгнати его? И рече им: сей род ничимже может изыти, токмо молитвою и постом. И оттуду изшедше, идяху сквозе Галилею, и не хотяше, да кто увестъ. Учасе бо ученики Своя и глаголаше им, яко Сын Человеческий предан будет в руке человецесте, и убьют Его, и убиен быв, в третий день воскреснет.

**И преподобнаго, от Матфеа, зачало 10. [Мф. 4, 25 – 5, 12.]**

**Во** время оно, по Иисусе идоша народи мнози от Галилеи и десяти град, и от Иерусалима и Иудеи, и со онаго полу Иордана. Узрев же народы, взыде на гору, и седшу Ему, приступиша к Нему ученицы Его. И отверз уста Своя, учаше их, глаголя: блажени нищии духом, яко тех есть Царствие Небесное. Блажени плачущии, яко тии утешатся. Блажени кротцыи, яко тии наследят землю. Блажени алчущии и жаждущии правды, яко тии насытятся. Блажени милостивии, яко тии помиловани будут. Блажени честии сердцем, яко тии Бога узрят. Блажени миротворцы, яко тии сынове Божии нарекутся. Блажени изгнани правды ради, яко тех есть Царствие Небесное. Блажени есте, егда поносят вам, и ижденут, и рекут всяк зол глагол на вы лжуще, Мене ради. Радуйтеся и веселитесь, яко мзда ваша многа на небесех.

**Причастный:** Хвалите Господа с небес:

**Другий:** В память вечную: